

**BOSNA I HERCEGOVINA  
FEDERACIJA BOSNE I HERCEGOVINE  
UNSKO-SANSKI KANTON  
KANTONALNI ŠTAB CIVILNE ZAŠTITE**

Broj: 15-40-4-3326-4/20  
Bihać, 23.03.2020.godine

Na osnovu člana 108. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", br. 39/03, 22/06 i 43/10), člana 23. Pravilnika o načinu rada i funkcioniranja štabova i povjerenika CZ („Službene novine Federacije BiH“, broj: 77/06, 05/07 i 42/14), te Odluke o proglašenju stanja prirodne nepogode na području Unsko-sanskog kantona, broj:03-017-1532/2020 od 20.03.2020. godine, Kantonalni štab civilne zaštite na sjednici održanoj dana 23.03.2020. godine, donosi:

**N A R E D B U**

**I**

Obustavlja se rad svih ugostiteljskih objekata za pripremanje i prodaju hrane i pića: restorana, pizzeria, slastičarni, čevabdžinica, nargila barova, caffe i bistro barova, klubova, diskoteka, rad kafića u sklopu benzinskih pumpi, tržnih i shopping centara, kao i rad kazina i sportskih kladionica na području Unsko-sanskog kantona, do daljnjeg. Od ove naredbe se izuzimaju oni ugostiteljski objekti koji se, pismenim putem prema štabovima civilne zaštite i kriznim štabovima gradova/općina, izjasne da će obavljati isključivo dostavu hrane, uz pridržavanje mjera zaštite i fizičkog razmaka prilikom dostavljanja hrane i pića, s tim da i dalje ne smiju služiti hranu i piće u objektu, niti primati goste u objekte, pod uslovom da imaju važeće rješenje/odobrenje za rad izdato od strane nadležnog organa. Hotelima, hostelima, motelima i apartmanskim smještajima se dozvoljava prijem gostiju na noćenje uz obavezu dostavljanja podataka Ministarstvu zdravstva na adresu [zdravstvo@vladausk.ba](mailto:zdravstvo@vladausk.ba) i kantonalnoj upravi za inspeksijske poslove [inspekcija@vladausk.ba](mailto:inspekcija@vladausk.ba), uz pojačanu primjenu higijenskih mjera i mjera dezinfekcije. Rok: Do daljnjeg;

**II**

Obustavljaju se sva kulturna dešavanja i manifestacije u sklopu svih kulturnih institucija, a posebno: biblioteka, kina, muzeja, pozorišta, umjetničkih galerija i slično na području Unsko-sanskog kantona. Rok: Do daljnjeg;

**III**

Obustavlja se rad javnih bazena i kupališta, sportskih centara, spa centara, fitnes centara, teretana i slično na području Unsko-sanskog kantona. Rok: Do daljnjeg;

**IV**

Zabranjuje se održavanje svih javnih i privatnih skupova u Unsko-sanskom kantonu, posebno svadbi, proslava i sličnih okupljanja u organizaciji pravnih i fizičkih lica. Rok: Do daljnjeg;

## V

Ograničava se radno vrijeme administracije na području svih gradova i općina Unsko-sanskog kantona i rad se organizuje (uvodi) u vremenu od 8:00 do 13:00 sati. Rok: Do daljnjeg;

## VI

Obustavlja se rad svih shopping/tržnih centara, frizerskih i kozmetičkih salona, butika i ostalo.

Dozvoljava se rad trgovina osnovnim prehrambenim artiklima: supermarketima, hipermarketima, minimarketima, logističkim i distributivnim centrima hrane, pića i higijenskih proizvoda, pekarama, drogerijama, specijaliziranim trgovinama sa prehrambenim i higijenskim artiklima, trafikama, apotekama, prodavnicama dječije opreme, trgovinama obuće, poljoprivrednim apotekama i trgovinama za hranu životinja, hemijskim čistionicama, prodavnicama ortopedskih i drugih pomagala, benzinskim pumpama (osim dijela za pružanje ugostiteljskih usluga), mesnicama, ribarnicama kioscima i prodavnicama voća i povrća, apotekama, pekarama i benzinskim pumpama (rad na benzinskim pumpama odnosi se na prodaju naftnih derivata i artikle u trgovini, osim dijela za pružanje ugostiteljskih usluga).

Dozvoljava se rad trgovinama građevinskog materijala, vodo i eletromaterijala, trgovinama auto dijelova i bijele tehnike, te rad građevinskim firmama, knjižarama, mehaničarskim radnjama i sličnim servisnim djelatnostima, uz obavezne pojačane mjere zaštite uposlenika opremljenih zaštitnim rukavicama, maskama i naočalama, uz primjenu higijenskih mjera i mjera dezinfekcije i strogo ograničenje broja kupaca koji istovremeno mogu boraviti u prostoru (maksimalno 5 osoba).

Svim trgovinama sa dozvolom rada u ovim okolnostima, propisuje se obaveza zabrane grupisanja kupaca i označavanje na blagajnama i ulazima rastojanja među kupcima od najmanje dva metra, a rad se organizuje u vremenu od 08:00 do 16:00 sati.

Za sprovođenje ovih mjera zadužuju se Uprava policije USK-a i Kantonalna uprava za inspeksijske poslove.

## VII

Zabranjuje se svaki vid ulične prodaje, rad buvljih, sedmičnih pijaca, autopijaca i sličnih, izuzev zelenih pijaca na kojima se može prodavati voće, povrće i poljoprivredno-prehrambeni proizvodi do 13:00 sati, uz obavezno pridržavanje higijensko-epidemioloških mjera. Rok: Odmah;

## VIII

Nalaže se svim lokalnim samoupravama, kantonalnim upravama, privrednim društvima, fizičkim i pravnim licima na području Unsko-sanskog kantona da pojačaju provođenje opštih i posebnih mjera zaštite stanovništva od zaraznih bolesti, sa posebnim naglaskom na pojačanu vanrednu dezinfekciju poslovnih površina, te postavljanje dozatora sa dezinficijensom ispred ulaza. Nalaže se zabrana javnog prevoza (autobusi, taxi vozila, kombi vozila) na području Unsko-sanskog kantona. Rok: Do daljnjeg;

## IX

Zabranjuje se okupljanje građana na javnim igralištima, igraonicama, parkovima i drugim javnim površinama na području Unsko-sanskog kantona, u cilju zaštite zdravlja stanovništva, u skladu sa prisutnim epidemiološkim rizicima. Zabranjuje se svako privatno okupljanje građana na javnim površinama u periodu od 18:00 do 05:00 sati. Rok: Do daljnjeg;

## X

Zabranjuje se provođenje vjerskih obreda svim konfesijama na području USK, a koje podrazumijevaju okupljanje većeg broja vjernika na jednom mjestu, do daljnjeg. Rok: Odmah;

## XI

Nalaže se Službi za poslove sa strancima da odredi, u saradnji sa Međunarodnom organizacijom za migracije (IOM), unutar svih privremenih prihvatnih centara u USK, a čiji su upravitelji (Bira i Borići u Bihacu, Sedra u Cazinu i Miral u V. Kladuši), da odrede izolacione prostorije u koje bi se mogli izmjestiti sumnjivi slučajevi kod migranata i tražioca azila iz tog prihvatnog centra. Nalaže se inspektorima Službe za poslove s strancima da vrše nadzor nad poštivanjem mjera samoizolacije u izolacionim sobama ovih prihvatnih centara.

Zabranjuje se kretanje i izlazak migranata izvan privremenih prihvatnih centara na području USK (Bira, Miral, Sedra, Borići), kao i svaki drugi vid kretanja migranata na području USK.

Nalaže se hitno izmještanje migranata koji se nalaze na ulicama, napuštenim objektima, privatnim smještajima i drugim mjestima van naseljenih područja USK.

Zabranjuje se prevoz migranata svim prevoznim sredstvima: Talgo voz, autobusi, kombi, taxi i drugo, prema USK, kao i prevoz na području USK. Osim prevoznim sredstvima zabranjuje se ulazak migranata koji idu pješice na područje USK.

Zabranjuje se smještaj migranata u privatne smještajne jedinice, tj. individualne stambene objekte, stanovi i kuće. Rok: Odmah;

## XII

Nalaže se, da se, pored higijensko-epidemioloških službi domova zdravlja, u kontrolu osoba kojima su izdata rješenja o samoizolaciji ili zdravstvenom nadzoru, uključe gradski/općinski komunalni redari i inspektori kojima će se od strane nadležnih organa grada/općina izdati odobrenje za sanitarni nadzor. Rok: Odmah;

## XIII

Zadužuju se savjeti mjesnih zajednica da obavještavaju gradske/općinske krizne štabove i nadležne policijske stanice o poznatim kretanjima osoba kojima su izdata rješenja o kućnoj izolaciji u svojim mjesnim zajednicama. Zaduju se svi predstavnici etažnih vlasnika u zgradama da odmah, u saradnji sa upraviteljima poduzmu mjere pojačane dezinfekcije i čišćenja svih zajedničkih prostorija i površina. Rok: Odmah;

## XIV

Prilikom ukopa umrlih preporučuje se obavljanje obreda sa minimalnim brojem prisutnih (članovi uže porodice) uz pridržavanje mjera minimalnog socijalnog kontakta (bez fizičkog kontakta). Rok: Kontinuirano;

## XV

Nalaže se organima upravljanja, upravnim organizacijama, institucijama, javnim ustanovama, preduzećima i ostalim pravnim subjektima koji se bave pružanjem usluga građanima (elektrodistribucija, telekomi, pošta, šalter sale gradova/općina, banke i sl.) da uvedu dvokratno radno vrijeme, gdje će između dva radna vremena izvršiti dezinfekciju prostorija i površina. Preporučuje se i da izvrše racionalizaciju potrebnog kadra za obavljanje rada u skladu sa pojačanim higijensko-epidemiološkim mjerama. Svi navedeni subjekti obavezni su dostaviti informaciju o poduzetim mjerama Kriznom štabu na mail adresu: [zdravstvo@vladausk.ba](mailto:zdravstvo@vladausk.ba). Dezinfekciju mogu obavljati HES Domova zdravlja, veterinarske stanice i privatni sektor. Rok: Do daljnjeg;

## XVI

Traži se od nadležnih inspekcija da sankcionišu svaki rast cijena prehrambenih i svih drugih artikala. Rok: Odmah i kontinuirano;

## XVII

Od Ministarstva obrazovanja, nauke, kulture i sporta USK, nalaže se da sagleda mogućnosti da nastavno osoblje obavlja potrebne aktivnosti od kuće. Rok: Odmah i kontinuirano;

## XVIII

Naređuje se poslodavcima da zaposlenim obezbijede neophodnu zaštitnu opremu (rukavice, maske i naočale) i da redovno vrše dezinfekciju radnih prostorija i površina a sve u cilju zaštite zdravlja zaposlenih, u skladu sa prisutnim epidemiološkim rizicima.

Poslodavcima se preporučuje da prilikom organizacije posla, u skladu sa aktuelnom epidemiološkom situacijom, iskažu razumijevanje za osobe koje boluju od hroničnih bolesti koje za posljedicu imaju oslabljen imunitet, kao i za osobe koji su roditelji ili staratelji djece ili osoba sa posebnim potrebama.

Poslodavci trebaju radnicima dati upute za rad od kuće, ukoliko je to zbog prirode posla moguće odnosno ukoliko to proces rada dozvoljava.

Poslodavci trebaju omogućiti korištenje godišnjeg odmora, radnicima preko 55 godina starosti i hroničnim bolesnicima, kao i korištenje odsustva u skladu sa zakonom, kolektivnim ugovorom ili pravilnikom o radu.

Traži se od poslodavaca, čiji su zaposlenici roditelji malodobne djece do 10 godina i djece sa posebnim potrebama, zavisno od važnosti obavljanja poslova zaposlenika u današnjoj situaciji ( zdravstveni radnici, policajci, inspektori i drugi), da procijene da li mogu omogućiti plaćeno odsustvo sa rada tih zaposlenika, kao i koliko dugo mogu omogućiti odsustvo u skladu sa Zakonom.

Preporučuje se poslodavcima, naročito proizvodnih djelatnosti, da sagledaju mogućnost skraćivanja radnog vremena sa periodičnim rotiranjem radnika, zbog redukcije međusobnih kontakata uz visoke mjere higijenske zaštite i dezinfekcije radnog prostora zbog kretanja većeg broja radnika ( CareFusion BH 335 d.o.o. Cazin, Saniteks d.d. Velika Kladuša i dr.)

Za provođenje mjera iz ove tačke zadužuju se inspektori Kantonalne uprave za inspekcijske poslove Unsko-sanskog kantona.

## XIX

Nalaže se Ministarstvu unutrašnjih poslova pojačana kontrola vozila sa inozemnim registarskim oznakama. Rok: Kontinuirano.

## XX

Ovom Naredbom stavlja se van snage Naredba Kantonalnog Štaba civilne zaštite USK, broj: 15-40-4-3326-2/20 od 20.03.2020. godine.

